

E PLUMA DI CARNAVAL

Jason Brown: "Lets Remix Carnaval 66"

SMAC kier trece hopi cambio



Durante lanzamiento di e jingle nobo di Carnaval Dialuna mainta, presidente di SMAC Jason Brown a hiba palabra. El a gradici RBC Bank pa un biaha mas aporta na un jingle cu ta carga nos Carnaval y ta expresa con nos tur como un isla ta sinti over di nos Carnaval, esta cu e ta duna

nos alegria.


"E aña aki e jingle lo tin mas nificacion, pasobra nos como SMAC tin hopi cambio cu nos kier trece".

"E jingle lo nifica hopi y nos ta spera di pone un Carnaval cu ta bay marca historia".

"Lets Remix Carnaval 66", Brown a termina.

E PLUMA DI CARNAVAL

Dialuna riba 11-11 net pa 11:11 di mainta, e jingle di Carnaval 66 a wordo lanza



Durante un conferencia di prensa na RBC Bank maestro di ceremonia Ruben Garcia a conta un tiki di e historia di e jingle di Aruba su Carnaval, unda cu e banco First cu despues a bira RBTT y awor ta RBC semper a sponsor esaki.

Pierre Rafini director di e banco a bisa cu e ta orguyoso cu e banco pa 23 aña ta patrocina e jingle, cu e aña aki a wordo canta pa e artista Galloway Jr (Carl Roosberg Jr).

"Nos ta sumamente orguyoso di e hecho cu RBC pa decadanan ta contribui cu Aruba su Carnaval y mi ta kere cu nos di RBC ta contento di aporta na Aruba su cultura y tambe

na su economia, pasobra Carnaval ta genera hopi placa pa Aruba".

"Diversidad di edad, sexo, opinion, cultura y historia ta trece diferente perspectiva".

"E ta parti di nos balornan primordial cu ta guia nos den nos trabao diario y cu ta crea e unidad y inspiracion".

"Nos musica di Carnaval ta un expresion di nos cultura y diversidad di nos isla Aruba".

Esaki segun Rafini, kende a sigui bisa cu sin musica no tin Carnaval y sin e participantenan tampoco tin Carnaval.

El a yama danki na tur cu a contribui na e jingle, incluyendo esnan cu a compone, aregla, mix y canta e cancion.

Esta e cantante Galloway Jr, e areglista ta Rocky Everon, e studio ta Toolbox Dominion, mientras cu mixing y mastering a wordo haci pa Backyard Promotion.

"Un danki ta bay sigur na e motor di e jingle pa mas cu 24 aña, esta Ruben Garcia", segun e director di RBC.